

四庫全書

集部

欽定四庫全書

集部

石倉歷代詩選卷四十四上

詳校官庶吉士

臣范逢恩

侍讀

臣

孫球覆勘

總校官進士

臣朱

鈐

校對官編修

臣潘曾起

謄錄監生

臣蔣

翰

欽定四庫全書

石倉歷代詩選卷四十四上

明 曹學佺 編

盛唐十三上

李白

字太白興聖
皇帝九世孫

關山月

明月出天山蒼茫雲海間長風幾萬里吹度玉門關
漢下白登道胡窺青海灣由來征戰地不見有人還
戍客

望邊色思歸多苦顏高樓當此夜歎息未應聞

結客少年場行

紫燕黃金瞳稜稜搖綠鬢平明相馳逐結客洛門東少
年學劍術凌轢白猿公珠袍曳錦帶七首揀吳鴻由來
萬夫勇挾此生雄風託交從劇孟買醉入新豐笑盡一
杯酒殺人都市中羞道易水寒從今日貫虹燕丹事不
立虛沒秦帝宮舞陽死灰人安可與成功

長干行

妾髮初覆額折花門前劇郎騎竹馬來遶牀弄青梅同
居長千里兩小無嫌猜十四為君婦羞顏未嘗開低頭
向暗壁千喚不一迴十五始展眉顏同塵與灰常存抱
柱信豈上望夫臺十六君遠行瞿塘滪灘堆五月不可
觸猿聲天上哀門前遲行跡一一生綠苔苔深不能掃
落葉秋風早八月蝴蝶黃雙飛西園草感此傷妾心坐
愁紅顏老早晚下三巴預將書報家相迎不道遠直至
長風沙

上之回

三十六離宮樓臺與天通
閣道步行月美人愁煙空恩
疎寵不及桃李傷春風淫樂
意何極金輿向回中萬乘
出黃道千旗揚彩虹前軍細
柳北後騎甘泉東豈問渭
川老寧邀襄野童但慕瑤池
宴歸來樂未窮

獨不見

白馬誰家子黃龍邊塞兒
天山三丈雪豈是遠行時
春蕙忽秋草莎雞鳴曲池風
摧寒機響月入霜閨悲憶與

君別年種桃齊蛾眉桃今百餘尺花落成枯枝終然獨
不見流淚空自知

妾薄命

漢帝重阿嬌貯之黃金屋咳唾落九天隨風生珠玉寵
極愛還歇妬深情却疎長門一步地不肯暫迴車雨落
不上天水覆難再收君情與妾意各自東西流昔日芙
蓉花今成斷腸草以色事他人能得幾時好

黃葛篇

金人集卷四十四上
黃葛生洛谿黃花自綿幕青煙蔓長條繚繞幾百尺閨
人費素手采緝作絺綌縫為絕國衣遠寄日南客蒼梧
大火落暑服莫輕擲此物雖過時是妾手中跡

怨歌行

十五入漢宮花顏笑春紅君王選玉色侍寢金屏中薦
枕嬌夕月卷衣戀香風寧知趙飛燕奪寵恨無窮沈憂
能傷人綠鬢成霜蓬一朝不得意世事徒為空鸛鷺換
美酒舞衣罷雕龍寒苦不忍言為君奏絲桐腸斷絃亦

絕悲心夜忡忡

塞下曲三首

天兵下北荒胡馬欲南飲橫戈從百戰直為銜恩甚握
雪海上餐拂沙隴頭寢何當破月氏然後方高枕

白馬黃金塞雲沙遶夢思那堪愁苦節遠憶邊城兒螢
飛秋窗滿月度霜閨遲摧殘梧桐葉蕭颯沙棠枝無時
獨不見流淚空自知

烽火動沙漠連照甘泉雲漢皇按劒起還召李將軍兵

氣天上合鼓聲隴底聞橫行負勇氣一戰淨妖氛

塞上曲

大漢無中策匈奴犯渭橋五原秋草綠胡馬一何驕
命將征西極橫行陰山側燕支落漢家婦女無花色
轉戰渡黃河休兵樂事多蕭條清萬里瀚海寂無波

湖邊采蓮婦

小姑織白紵未解將人語大嫂采芙蓉谿湖千萬重
長兄行不在莫使外人逢願學秋胡婦貞心比古松

秦女卷衣

天子居未央
妾來卷衣裳
顧無紫宮寵
敢拂黃金牀
水至亦不去
熊來尚可當
微身奉日月
飄若螢火光
願君采葑菲
無以下體妨

邯鄲才人嫁為廝養卒婦

妾本崇臺女
揚蛾入丹闕
自倚顏如花
寧知有凋歇
一辭玉階下去
若朝雲沒
每憶邯鄲城
深宮夢秋月
君王不可見
惆悵至明發

出自薊北門行

虜陣橫北荒胡星耀精芒羽書速驚電烽光晝連光虎
竹救邊急戎車森已行明主不安席按劍心飛揚推轂
出猛將連旗登戰場兵威衝絕漠殺氣凌穹蒼列陣赤
山下開營紫塞傍孟冬風沙緊旌旗颯凋傷畫角悲海
月征衣卷天霜揮刃斬樓蘭彎弓射賢王單于一平蕩
種落自奔亡收功報天子歌舞歸咸陽

發白馬

將軍發白馬旌節渡黃河
蕭鼓聒川嶽滄溟湧濤波
武安有振瓦易水無寒歌
鐵騎若雪山飲流涸滹沱
揚兵獵月窟轉戰略朝那
倚劍登燕然邊鋒列嵯峨
蕭條萬里外耕作五原多
一掃清大漠包虎戢金戈

陌上桑

美女渭橋東春還事蠶作五馬如飛龍
青絲結金絡不知誰家子調笑來相謔
妾本秦羅敷玉顏豔名都綠條映素手
採桑向城隅使君且不顧况復論秋胡
寒蠶愛

碧草鳴鳳棲青梧託心自有處但怪傍人愚徒令白日
暮高駕空踟躕

相逢行

朝騎五花馬謁帝出銀臺秀色誰家子雲車珠箔開金
鞭遥指點玉勒近遲回夾轂相借問疑從天上來邀入
青綺門當歌共銜杯銜杯映歌扇似月雲中見相見不
得親不如不相見相見情已深未語可知心胡為守空
閨孤眠愁錦衾錦衾與羅幃纏綿會有時春風正澹蕩

暮雨來何遲願因三青鳥更報長相思光景不待人須
更髮成絲當年失行樂老去徒傷悲持此道密意毋令
曠佳期

千里思

李陵沒胡沙蘓武還漢家迢迢五原關朔雪亂邊花一
去隔絕國思歸但長嗟鴻雁向西北因書報天涯

折楊柳

垂楊拂淶水搖豔東風年花明玉關雪葉煖金窗煙美

人結長想對此心悽然攀條折春色遠寄龍庭前

少年子

青雲少年子挾彈章臺左鞍馬四邊開突如流星過金
丸落飛鳥夜入瓊樓卧夷齊是何人獨守西山餓

少年行

擊筑飲美酒劍歌易水湄經過燕太子結託并州兒少
年負壯氣奮烈自有時因聲魯勾踐爭搏勿相欺

豫章行

胡風吹代馬北擁魯陽關吳兵照海雪西討何時還半
渡上遼津黃雲慘無顏老母與子別呼天野草間百鳥
繞旌旗悲鳴相追攀白楊秋月苦早落豫章山本為休
明人斬虜素不閒豈惜戰鬪死為君掃穴頑精感石沒
羽豈云憚險艱樓船若鯨飛波蕩落星灣此曲不可奏
三軍鬢成斑

沐浴子

沐芳莫彈冠浴蘭莫振衣處世忌太潔至人貴藏輝滄

浪有釣叟吾與爾同歸

鳳凰曲

羸女吹玉簫吟弄天上春青鸞不獨去更有攜手人影
滅彩雲斷遺聲落西秦

秋思

春陽如昨日碧樹鳴黃鸝蕪然蕙草暮颯爾涼風吹天
秋木葉下月冷莎雞悲坐愁羣芳歇白露凋華滋

春思

燕草如碧絲秦桑低綠枝當君懷歸日是妾斷腸時春
風不相識何事入羅幃

子夜四時歌四首

秦地羅敷女采桑綠水邊素手青條上紅妝白日鮮
蠶飢妾欲去五馬莫留連

鏡湖三百里菡萏發荷花五月西施采人看隘若耶回
首不待月歸去越王家

長安一片月萬戶擣衣聲秋風吹不盡總是玉關情何

日平胡虜良人罷遠征

明朝驛使發一夜絮征袍素手抽針冷那堪把剪刀裁
縫寄遠道幾日到臨洮

對酒行二首

松子棲金華安期入蓬海此人古之仙羽化竟何在浮
生速流電倏忽變光彩天地無凋換容顏有遷改對酒
不肯飲含情欲誰待

勸君莫拒杯春風笑人來桃李如舊識傾花向我開流

鶯啼碧樹明月窺金罍昨來朱顏子今日白髮催棘生
石虎殿鹿走姑蘇臺自古帝王宅城闕閉黃埃君若不
飲酒昔人安在哉

長歌行

桃李得日開榮華照當年東風動百物草木盡欲言枯
枝無醜葉涸水吐清泉大力運天地義和無停鞭功名
不早著竹帛將何宣桃李務青春誰能貫白日富貴與
神仙蹉跎成兩失金石猶銷鑠風霜無久質畏落日月

後強歡歌與酒秋霜不惜人倏忽侵蒲柳

秋浦歌

秋浦長似秋蕭條使人愁客愁不可度行上東大樓正
西望長安下見江水流寄言向江水汝意憶儂不遙傳
一掬淚為我達楊州

擬古

融融白玉輝映我青蛾眉寶鏡似空水落花如風吹出
門望帝子蕩漾不可期安得黃鶴羽一報佳人知

古意

君為女蘿草，妾作兔絲花。
輕條不自引，為逐春風斜。
百丈託遠松，纏綿成一家。
誰言會面易，各在青山崖。
女蘿發馨香，兔絲斷人腸。
枝枝相糾結，葉葉競飄揚。
生子不知根，因誰共芬芳。
中巢雙翡翠，上宿紫鴛鴦。
若識二草心，海潮亦可量。

古風

大雅久不作，吾衰竟誰陳。
王風委蔓草，戰國多荆榛。
龍

虎相啖食兵戈逮狂秦正聲何微茫哀怨起騷人揚馬
激頽波開流蕩無垠廢興雖萬變憲章亦已淪自從建
安來綺麗不足珍聖代復元古垂衣貴清真羣才屬休
明乘運共躍鱗文質相炳煥衆星羅秋旻我志在刪述
垂輝映千春希聖如有立絕筆于獲麟

蟾蜍薄太清蝕此瑤臺月圓光虧中天金魄遂淪沒
蟬入紫微大明夷朝暉浮雲隔兩曜萬象昏陰霏蕭蕭
長門宮昔是今已非桂蠹花不實天霜下嚴威沈歎終

永夕感我涕沾衣

代馬不思越越禽不戀燕情性有所習土風固其然昔
別雁門關今戍龍庭前驚沙亂海日飛雪迷胡天蟣蝨
生虎鷁心魂逐旌旄苦戰功不賞忠誠難可宣誰憐李
飛將白首沒三邊

客有鶴上仙飛飛凌太清揚言碧雲裏自道安期名兩
兩白玉童雙吹紫鸞笙去影忽不見迴風送天聲舉首
遠望之飄然若流星願餐金光草壽與天齊傾

咸陽二三月宮柳黃金枝綠幘誰家子賣珠輕薄兒日
暮醉酒歸白馬驕且馳意氣人所仰冶遊方及時子雲
不曉事晚獻長楊辭賦達身已老草玄鬢若絲投閣良
可嘆但為此輩嗤

松栢本孤直難為桃李顏昭昭嚴子陵垂釣滄波間身
將客星隱心與浮雲閒長揖萬乘君還歸富春山清風
灑六合邈然不可攀使我長歎息冥棲巖石間

君平既棄世世亦棄君平觀變窮大易探元化羣生寂

冥綴道論空簾閉幽情騶虞不虛來鸞鷟有時鳴安知
天漢上白日懸高名海客去已久誰人測沈冥

燕昭延郭隗遂築黃金臺劇辛方趙至鄒衍復齊來奈
何青雲士棄我如塵埃珠玉買歌笑糟糠養賢才方知
黃鶴舉千里獨徘徊

寶劍雙蛟龍雪花照芙蓉精光射天地雷騰不可衝一
去別金匣飛沈失相從風胡滅已久所以潛其鋒吳水
深萬丈楚山邈千重雌雄終不隔神物會當逢

西嶽蓮花山迢迢見明星素手把芙蓉虛步躡太清霓
裳曳廣帶飄拂昇天行邀我登雲臺高揖衛叔卿恍恍
與之去駕鴻凌紫冥俯視洛陽川茫茫走胡兵流血塗
野草豺狼盡冠纓

泣與親友別欲語再三咽勗君青松心努力保霜雪世
路多險艱白日欺紅顏分首各千里去去何時還

秦水別隴首幽咽多悲聲胡馬顧朔雪蹊蹠長嘶鳴感
物動我心緬然含歸情昔視秋蛾飛今見春蠶生嫋嫋

桑柘葉萋萋柳垂榮急節謝流水羈心搖懸旌揮涕且
復去惻愴何時平

世道日交喪澆風散淳源不采芳桂枝反栖惡木根所
以桃李樹吐花竟不言大運有興沒羣動爭飛奔歸來
廣成子去入無窮門

燕趙有秀色綺樓青雲端睂目豔皎月一笑傾城歡常
恐碧草晚坐泣秋風寒織手怨玉琴清晨起長歎焉得
偶君子共乘雙飛鸞

蓐收肅金氣西陸弦海月秋蟬號階軒感物憂不歇良
辰竟何許大運有淪忽天寒悲風生夜久衆星沒惻惻
不忍言哀歌逮明發

抱玉入楚國見疑古所聞良寶終見棄徒勞三獻君直
木忌先伐芳蘭哀自焚盈滿天所損沈冥道為羣東海
汎碧水西關乘紫雲魯連及柱史可以躡清芬

淮海對雪贈傅霑

朔雪落吳天從風渡漠渤海樹成陽春江沙皓明月飄

鉶四荒外想像千花發
瑤草生階墀玉塵散庭闕
刻溪興空在郢路歌未歇
寄君梁甫吟曲盡心斷絕

贈范金卿

君子枉清盼不知東走迷
離家未幾月絡緯鳴中閨
桃李君不言攀花願成蹊
那能吐芳信惠好相招攜
我有結綠珍久藏濁水泥
時人棄此物乃與燕珉齊
撫拭欲贈之申眉路無梯
遼東慙白豕楚客羞山雞
徒有獻芹心終流泣玉啼
祇應自索漠留舌示山妻

贈何七判官昌浩

有時忽惆悵匡坐至夜分
平明空嘯咤思欲解世紛
心隨長風去吹散萬里雲
羞作濟南生九十誦古文
不然拔劍起沙漠收奇勲
老死田陌間何因揚清芬
夫子今管樂英才冠三軍
終與同出處豈將沮溺羣

贈嵩山焦鍊師

二室凌青天三花含紫煙
中有蓬海客宛疑麻姑仙
道在喧莫染跡高想已縣
時餐金鸞藥屢讀青苔篇
八極

恣遊憩九垓長周旋下瓢酌潁水舞鶴來伊川還歸空
山上獨拂秋霞眠蘿月掛朝鏡松風鳴夜絃潛光隱嵩
嶽鍊魄棲雲幄霓裳何飄飄鳳吹轉縣邈願同西王母
下顧東方朔紫書僅可傳冥骨誓相學

憶襄陽舊遊贈濟陰馬少府巨

昔為大堤客曾上山公樓開窗碧嶂滿拂鏡滄江流高
冠挂雄劍長揖韓荊州此地別夫子今來思舊遊朱顏
君未老白髮我先秋壯志恐蹉跎功名若雲浮歸心結

遠夢落日生古愁空思羊叔子墮淚峴山頭

贈崔郎中宗之

胡雁拂海翼翱翔鳴素秋驚雲辭沙朔飄薄迷河洲有
如飛蓬人去逐萬里遊登高望浮雲彷彿如舊丘日從
海傍沒水向天邊流長嘯倚孤劍目極心悠悠歲晏歸
去來富貴安所求仲尼七十說歷聘莫見收魯連逃千
金珪組豈可酬時哉苟不會草木為我儔希君同攜手
長往南山幽

贈秋浦柳少府

秋浦舊蕭索，公庭人吏稀。
因君樹桃李，此地忽芳菲。
搖筆望白雲，開簾當翠微。
時來引山月，縱酒酣清暉。
而我愛夫子，淹留未忍歸。

贈盧司戶

秋色無遠近，出門盡寒山。
白雲遙相識，待我蒼梧間。
借問盧耽鶴，西飛幾歲還。

自梁園至敬亭山見會公談陵陽山水兼期同

遊因有此贈

我隨秋風來瑶草恐哀歇中途寡名山安得弄雲月渡
江如昨日黃葉向人飛敬亭愜素尚弭棹流清輝氷谷
明且秀陵巒抱江城粲粲吳與史衣冠耀天京水國饒
英竒潛光卧幽草會公真名僧所在即為寶開堂振白
拂高論橫青雲雪山掃粉壁墨客多新文為余話幽栖
且述陵陽美天開白龍潭月映清秋水黃山望石柱突
兀誰開張黃鶴久不來子安在蒼茫東南焉可窮山鳥

飛絕處稠疊千萬峰相連入雲去聞此期振策歸來空
閉關相思如明月可望不可攀何當移白足早晚凌蒼
山

贈從弟冽

楚人不識鳳重價求山雞獻主昔云是今來方覺迷自
居漆園北久別咸陽西風飄落日去節變流鶯啼桃李
寒未開幽關豈成蹊逢君發花萼若與青雲齊及此桑
葉綠春蠶起中閨日出撥轂鳴田家擁鋤犁顧余乏尺

土東作誰相攜傳說降霖雨公輸造雲梯羗戎事未息
君子悲塗泥報國有長策成功羞執珪無由謁明主杖
策還蓬藜他年爾相訪知我在礪谿

贈閭丘處士

賢人有素業乃在沙塘陂竹影掃秋月荷花落古池閒
讀山海經散帙卧遙帷且耽田家樂遂曠林中期野酌
勸芳酒園蔬烹露葵如能樹桃李為我結茅茨

贈宣州靈源寺仲濬公

敬亭白雲氣秀色連蒼梧下映雙谿水如天落鏡湖此
中積龍象獨許濬公殊風韻逸江左文章動海隅觀心
同水月解領得明珠今日逢支遁高談出有無

登敬亭山南望懷古贈竇主簿

敬亭一迴首目盡天南端仙者五六人常聞此遊盤谿
連琴高水石聳麻姑壇白龍降陵陽黃鶴呼子安羽化
騎日月雲行翼鵷鸞下視宇宙間四溟空波瀾決絕目
下事從之復何難百歲落半途前期浩漫漫強食不成

味清晨起長歎願隨子明去鍊火燒金丹

登巴陵開元寺西閣贈衡嶽僧方外

衡嶽有開士五峰秀真骨見君萬里心海水照秋月大
臣南溟去問道皆請謁灑以甘露言清涼潤肌髮明湖
落天鏡香閣凌銀闕登眺餐惠風心花期啓發

安陸白兆山桃花巖寄劉侍御綰

雲卧三十年好閒復愛仙蓬壺雖冥絕鸞鶴心悠然歸
來桃花巖得憩雲窗眠對嶺人共語飲潭猿相連時昇

翠微上邈若羅浮顛兩岑抱東壑一嶂橫西天樹雜日
易隱崖傾月難圓芳草換野色飛蘿搖春煙入遠構石
室選幽開山田獨此林下意杳無區中緣永辭霜臺客
千載方來旋

望終南山寄紫閣隱者

出門見南山引領意無限秀色難為名蒼翠日在眼有
時白雲起天際自舒卷心中與之然託興每不淺何當
造幽人滅跡棲絕巘

夕霽杜陵登樓寄韋繇

浮雲滅霽景萬物各秋容
登樓送遠目伏檻覩羣峰
原野曠超緬關河紛錯重
清輝映竹日翠色明雲松
蹈海寄遐想還山迷舊蹤
徒然迫晚暮未果諧心胸
結桂空佇立折麻恨莫從
思君達永夜長樂聞疎鐘

秋山寄衛尉張卿及王徵君

何以折相贈白花青桂枝
月華若夜雪見此令人思
雖然剡溪興不異山陰時
明發懷二子空吟招隱詩

月夜江行寄崔員外宗之

飄飄江風起蕭颯海樹秋登艫美清夜挂席移輕舟月
隨碧山轉水合青天流杳如星河上但覺雲林幽歸路
方浩浩徂川去悠悠徒悲蕙草歇復聽菱歌愁岬曲迷
後浦沙明瞰前洲懷君不可見望遠增離憂

宿白鷺洲寄楊江寧

朝別朱雀門暮棲白鷺洲波光搖海月星影入城樓望
美金陵宰如思瓊樹憂徒令魂入夢翻覺夜成秋綠水

解人意爲余西北流因聲玉琴裏蕩漾寄君愁

新林浦阻風寄友人

潮水定可信天風難與期清晨西北轉薄暮東南吹以
此難挂席佳期益相思海月破圓景孤蔣生綠池昨日
北湖梅開花已滿枝今朝白門柳夾道垂青絲歲物忽
如此我來定幾時紛紛江上雪草草客中悲明發新林
浦空吟謝眺詩

寄東魯二穉子

吳地桑葉綠吳蠶已三眠我家寄東魯誰種龜茲田春
事已不及江行復茫然南風吹歸心飛墮酒樓前樓東
一株桃枝葉拂青煙此樹我所種別來向三年桃今與
樓齊我行尚未旋嬌女字平陽折花倚樓邊小兒名伯
禽與姊亦齊肩雙行桃樹下撫背復誰憐念此失次第
肝腸日憂煎裂素寫遠意因之汶陽川

下潯陽城汎彭蠡寄黃判官

浪動濯嬰井潯陽江上風開帆入天鏡直向彭湖東落

景轉疎雨晴雲散遠空
名山發佳興清賞亦何窮
石鏡挂遙月香爐滅彩虹
相思俱對此舉目與君同

書情寄從弟邠州長史昭

自笑客行久我行定幾時
綠楊已可折攀取最長枝
翩翾弄春色延佇寄相思
誰言貴此物意願重瓊蕤
昨夢見惠連朝吟謝公詩
東風引碧草不覺生華池
臨翫忽云夕杜鵑夜鳴悲
懷君芳歲歇庭樹落紅滋

江夏寄漢陽輔錄事

誰道此水廣狹如一匹練江夏黃鶴樓青山漢陽縣人
語猶可聞故人難可見君草陳琳檄我書魯連箭報國
有壯心龍顏不迴眷西飛精衛鳥東海何由填鼓角徒
悲鳴樓船習征戰抽劍步霜月夜行空庭徧長呼結浮
雲埋沒顧榮扇他日觀軍容投壺接高宴

涇谿南藍山下有落星潭可以卜築余泊舟石

上寄何判官昌浩

藍岑竦天壁突兀如鯨額奔蹙橫澄潭勢吞落星石沙

帶秋月明水搖寒山碧佳境宜緩棹清輝能留客恨君
阻歡遊使我自驚惕所期俱卜築結茅鍊金液

早過漆林渡寄萬巨

西經大藍山南來漆林渡水色倒空青林煙橫積素漏
流昔吞翕沓浪競奔注潭落天上星龍開水中霧巉巖
注公柵突兀陳焦墓嶺峭紛上千川明屢迴顧因思萬
夫子解渴同瓊樹何日覩清光相歡詠佳句

江行寄遠

剗木出吳楚危檣百餘尺疾風吹片帆日暮千里隔別
時酒猶在已為異鄉客思君不可得愁見江水碧

以詩代書答元丹丘

青鳥海上來今朝發何處口銜雲錦字與我忽飛去鳥
去凌紫煙書留綺窗前開緘方一笑乃是故人傳故人
深相勗憶我勞心曲雜居在咸陽三見秦草綠置書雙
袂間引領不暫閒長望香難見浮雲橫遠山

答從弟幼成過西園見贈

一身自瀟灑萬物何囂喧拙薄謝明時棲閒歸故園二
季過舊壑四鄰馳華軒衣劍照松宇賓徒光石門山童
薦珍果野老開芳樽上陳樵漁事下叙農圃言昨來荷
花滿今見蘭苕繁一笑復一歌不知夕景昏醉罷同所
樂此情難具論

答族姪僧中孚贈玉泉仙人掌茶

并序

余聞荊州玉泉寺近清谿諸山山洞往往有乳窟
窟中多玉泉交流中有白蝙蝠大如鴉按仙經蝙蝠

蝠一名仙鼠千歲之後體白如雪棲則倒懸蓋飲乳水而長生也其水邊處處有茗草羅生枝葉如碧玉惟玉泉真公常采而飲之年八十餘歲顏色如桃花而此茗清香滑熟異於他者所以能還童振枯扶人壽也余遊金陵見宗僧中孚示余茶數十片拳然重疊其狀如手號仙人掌茶蓋新出乎玉泉之山曠古未覩因持之見遺兼贈詩要余答之遂有此作後之高僧大隱知仙人掌茶發乎中

孚禪子及青蓮居士李白也

嘗聞玉泉山洞多乳窟仙鼠如白鴉倒懸深谿月茗
生此中石玉泉流不歇根柯灑芳津采服潤肌膚楚老
卷綠葉枝枝相接連曝成仙人掌似拍洪崖肩舉世未
見之其名定誰傳宗英乃禪伯投贈有佳篇清鏡燭無
鹽顧慙西子妍朝坐有餘興長吟播諸天

答裴侍御先行至石頭驛以書見招期月滿泛

洞庭

君至石頭驛寄書黃鶴樓開緘識遠意速此南行舟風
水無定準湍波或滯留憶昨新月生西簷若瓊鉤今來
何所似破鏡懸清秋恨不三五明平湖泛澄流此歡竟
莫遂狂殺王子猷巴陵定近遠持贈解人憂

送王屋山人魏萬還王屋

仙人東方生浩蕩弄雲海沛然乘天遊獨往失所在魏
侯繼大名本家聊攝城卷舒入元化跡與古賢并十三
弄文史揮筆如振綺辯折田巴生心齊魯連子西涉清

洛源頗驚人世喧采秀卧王屋因窺洞天門竭來遊嵩
峯羽客何雙雙朝攜月光子暮宿玉女窗鬼谷上窈窕
龍潭下奔淥東浮汴河水訪我三千里逸興滿吳雲飄
飄浙江汜揮手杭越間樟亭望潮還濤捲海門石雲橫
天際山白馬走素車雷奔駭心顏遙聞會稽美且度耶
溪水萬壑與千巖崢嶸鏡湖裏秀色不可名清輝滿江
城人遊月邊去舟在空中行此中久延佇八剡尋王許
笑讀曹娥碑沈吟黃絹語天台連四明日入向國清五

峰轉月色百里行松聲靈谿恣沿越華頂殊超忽石梁
橫青天側足履半月眷然思永嘉不憚海路賒挂席歷
海嶠迴瞻赤城霞赤城漸微沒孤嶼前峽兀水續萬古
流亭空千霜月縉雲川谷難石門最可觀瀑布挂北斗
莫窮此水端噴壁灑素雪空濛生晝寒却尋惡谿去寧
懼惡谿惡咆哮七十灘水石相噴薄路創李北海巖開
謝康樂松風和猿聲搜索連洞壑徑出梅花橋雙谿納
歸潮落帆金華岸赤松若可招沈約百詠樓城西孤岩

峽峽四荒外曠望羣川會雲卷天地開波連浙西大
亂流新安口北指嚴光瀨釣臺碧雲中邈與蒼梧對稍
稍來吳都徘徊上姑蘇煙絲橫九疑潏蕩見五湖目極
心更遠悲歌但長吁迴橈楚江濱揮策楊子津身著日
本裘昂藏出風塵五月造我語知非儻儼人相逢樂無
限水石日在眼徒干五諸侯不致百金產吾友揚子雲
絃歌播清芬雖為江寧宰好與山公羣乘興但一行且
知我愛君君來幾何時仙臺應有期東窗綠玉樹定長

三五枝至今天壇人當笑爾歸遲我苦昔遠別茫然使
心悲黃河若不斷白首長相思

送友人遊梅湖

送君遊梅湖應見梅花發有使寄我來無令素芳歇暫
行新林浦定醉金陵月莫惜一雁書音塵坐胡越

送崔十二遊天竺寺

還聞天竺寺夢想懷東越每年海樹霜桂子落秋月送
君遊此地已屬流芳歇待我來歲行相隨浮溟渤

送楊山人歸天台

客有思天台東行路超忽濤落浙江秋沙明浦陽月今
遊方厭楚昨夢先歸越且盡秉燭歡無辭凌晨發我家
小阮賢剖竹赤城邊詩人方見重官燭未曾然興引登
山屐情催泛海船石橋如可渡攜手弄雲煙

送溫處士歸黃山白鷺峰舊居

黃山四千仞三十二蓮峰丹崖夾石柱菑蓄金芙蓉伊
昔昇絕頂下窺天目松仙人鍊玉處羽化留餘蹤亦聞

溫伯雪獨往今相逢采秀辭五嶽攀巖歷萬重歸休白
鷺頰渴飲丹沙井鳳吹我時來雲車爾當整去去凌陽
東行行芳桂叢迴谿十六度碧嶂盡晴空他日還相訪
乘橋躡彩虹

送韓準裴政孔巢父還山

獵客張兎豕不能挂龍虎所以青雲人高歌在巖戶韓
生信英彥裴子含清真孔侯復秀出俱與雲霞親峻節
凌遠松同衾卧盤石斧冰漱寒泉三子同二履時時或

乘興去去雲無心出山揖牧伯長嘯輕衣簪昨宵夢裏
還云弄竹谿月今晨魯東門悵飲與君別雪崖滑去馬
蘿徑迷歸人相思若煙草歷亂無冬春

送楊少府赴選

大國置衡鏡準平天地心羣賢無邪人朗鑒窮深吾
君詠南風袞冕彈鳴琴時泰多美士京國會簪纓山苗
落澗底幽松出高岑夫子有盛才主司得球琳流水非
鄭曲前行遇知音衣工剪綺繡一悞傷千金何惜刀尺

餘不栽寒女衾我非彈冠者感別但開襟空谷無白駒
賢人豈悲吟大道安棄物時來或招尋爾見山吏部當
應無陸沈

對雪奉餞任城六父秩滿歸京

龍虎謝鞭策鷓鴣不司晨君看海上鶴何似籠中鶉獨
用天地心浮雲乃吾身雖將簪組狎若與煙霞親季父
有英風白眉超常倫一官即夢寐脫屣歸西秦竇公敞
華筵墨客盡來臻燕歌落胡雁郢曲迴陽春征馬百度

嘶遊車動行塵躊躇未忍去戀此四座人
餞離駐高駕惜別空殷勤何時竹林下更與步兵鄰

魯郡堯祠送吳五之瑯琊

堯沒三千歲青松古廟存送行奠桂酒拜舞清心魂
日色促歸人連歌倒芳樽馬嘶俱醉起分手更何言

金鄉送韋八之西京

客自長安來還歸長安去狂風吹我心西挂咸陽樹
此情不可道此別何時遇望望不見君連山起煙霧

送族弟凝至晏堏單父三十里

雪滿原野白戎裝出盤遊揮鞭布獵騎四顧登高丘
起馬足間蒼鷹下平疇喧呼相馳逐取樂銷人憂捨此
戒禽荒微聲列齊謳鳴雞發宴堏別雁驚淶溝西行有
東音寄與長河流

魯城北郭曲腰桑下送張子還嵩陽

送別枯桑下凋葉落半空我行憊道遠爾獨知天風誰
念張仲蔚還依蒿與蓬何時一杯酒更與李鷹同

送族弟單父主簿凝攝宋城主簿至郭南月橋
却迴棲霞山留飲贈之

吾家青萍劍操割有餘閒往來糾二邑此去何時還
鞍馬月橋南光輝岐路間賢豪相追餞却到棲霞山羣花
散芳園斗酒開離顏樂酣相顧起征馬無由攀

魯郡東石門送杜二甫

醉別復幾日登臨徧池臺何時石門下重有金樽開
秋波落泗水海色明徂徠飛蓬各自遠且盡林中杯

送裴十八圖南歸嵩山

何處可為別長安青綺門胡姬出素手延客醉金樽臨
當上馬時我獨與君言風吹芳蘭折日沒鳥雀喧舉手
指飛鴻此情難具論同歸無早晚潁水有清源

同王昌齡送族弟襄歸桂陽

秦地見碧草楚謠對清樽把酒爾何思鷓鴣啼南園余
欲羅浮隱猶懷明主恩躊躇紫宮戀孤負滄洲言終然
無心雲海上同飛翻相欺乃不淺幽桂有芳根

魯中送二從弟赴舉之西京

魯客向西笑君門若夢中霜凋逐臣髮日憶明光宮復
羨二龍去才華冠世雄平衢騁高足逸翰凌長風舞袖
拂秋月歌筵聞早鴻送君日千里良會何由同

送楊燕之東魯

關西楊伯起漢日舊稱賢四代三公族清風播人天夫
子華陰居開門對玉蓮何事歷衡霍雲帆今始還君坐
稍解顏為君歌此篇我固侯門士謬登聖主筵一辭金

華殿蹭蹬長江邊
二子魯門東別來已經年
因君此中去不覺淚如泉

餞校書叔雲

少年費白石歌笑矜朱顏
不知忽已老喜見春風還
惜別且為歡徘徊桃李間
看花飲美酒聽鳥臨晴山
向晚竹林寂無人空閉關

送趙判官赴黔府中丞叔幕

廓落青雲心結交黃金盡
富貴翻相忘令人忽自哂
蹭

澄鬢毛斑盛時難再還
巨源咄石生何事馬蹄間
綠蘿長不厭却欲還東山
君為魯曾子拜揖高堂裏
叔繼趙平原偏承明主恩
風霜推獨坐旌節鎮雄藩
虎士秉金鉞蛾眉開玉樽
才高幕下去義重林中言
水宿五谿月霜啼三峽猿
東風春草綠江上候歸軒

送崔氏昆季之金陵

放歌倚東樓行子期曉發
秋風渡江來吹落山上月
主
人出美酒滅燭延清光
二崔向金陵安得不盡觴
水客

弄歸棹雲帆卷輕霜扁舟敬亭下五兩先飄揚峽石入
水花碧流日更長思君無歲月西笑阻河梁

送內尋廬山女道士李騰空二首

君尋騰空子應到碧山家水舂雲母碓風掃石楠花若
戀幽居好相邀弄紫霞

多君相門女學道愛神仙素手掬青靄羅衣曳紫煙一
往屏風疊乘鸞著玉鞭

贈別舍人弟臺卿之江南

去國客行遠還山秋夢長梧桐落金井一葉飛銀牀覺
罷攬朝鏡鬢毛颯已霜良圖委蔓草古貌成枯桑欲道
心下事時人疑夜光因為洞庭葉飄落之瀟湘令弟經
濟士謫居我何傷潛蚪隱尺水著論談興亡客遇王子
喬口傳不死方入洞過天地登真朝玉皇吾將撫爾背
揮手遂翱翔

留別王司馬嵩

魯連賣談笑豈是顧千金陶朱雖相越本有五湖心余

亦南陽子時為梁甫吟蒼山容偃蹇白日惜顏侵願一
佐明主功成還舊林西來何所為孤劍託知音鳥愛碧
山遠魚遊江海深呼鷹過上蔡賣畚向嵩岑他日聞相
訪丘中有素琴

將遊衡嶽過漢陽雙松亭留別族弟浮屠談皓
秦欺趙氏璧却入邯鄲宮本是楚家玉還來荆山中符
彩照滄溟精輝凌白虹青蠅一相點流落此時同卓絕
道門秀談玄乃支公延蘿結幽居剪竹繞芳叢涼花拂

戶牖天籟鳴虛空憶我初來時蒲萄開景風今茲大火
落秋葉黃梧桐水色夢沅湘長沙去何窮寄書訪衡嶠
但與南飛鴻

留別賈舍人至

秋風吹胡霜凋此簷下芳羈人怨歲晚離別悽以傷謬
攀青瑣賢延我於此堂君為長沙客我獨之夜郎勸此
一杯酒豈惟道路長割珠兩分贈寸心貴不忘何必兒
女仁相看淚成行

別韋少府

西出蒼龍門南登白鹿原
欲尋商山皓猶戀漢皇恩
水國遠行邁仙經深討論
洗心向谿月清耳敬亭猿
築室在人境閉關無世誼
多君枉高駕贈我以微言
交乃意氣合道因風雅存
別離有相思瑤瑟與金樽

遊泰山

四月上泰山石平御道開
六龍過萬壑澗谷隨縈迴
馬跡遶碧峰于今滿青苔
飛流灑絕巘水急松聲哀
北眺

嶂嶠奇傾崖向東摧洞門閉石扇地底興雲雷登高望
蓬瀛想像金銀臺天門一長嘯萬里清風來玉女四五
人飄飄下九垓含笑引素手遺我流霞杯稽首再拜之
自愧非仙才曠然小宇宙棄世何悠哉

清曉騎白鹿直上天門山山際逢羽人方瞳好容顏捫
蘿欲就語却掩青雲關遺我鳥跡書飄然落巖間其字
乃上古讀之了不閑感此三歎息從師方未還

平明登日觀舉手開雲關精神四飛揚如出天地間黃

河從西來窈窕入遠山憑崖覽八極目盡長空間偶然
值青童綠髮雙雲鬟笑我晚學仙蹉跎凋朱顏躊躇忽
不見浩蕩難追攀

朝飲王母池暝投天門關獨抱綠綺琴夜行青山間山
明月露白夜靜松風歇仙人遊碧峰處處笙歌發寂聽
娛清暉玉真連翠微想像鸞鳳舞飄飄龍虎衣捫天摘
瓠瓜恍惚不憶歸舉手弄清淺誤攀織女機明晨坐相
失但見五雲飛

遊南陽清冷泉

惜彼落日暮愛此寒泉清
西輝逐流水蕩漾遊子情
空歌望雲月曲盡長松聲

尋魯城北范居士失道落蒼耳中見范置酒摘

蒼耳作

雁度秋色遠日靜無雲時
客心不自得浩漫將何之
忽憶范野人閉園養幽姿
茫然起逸興但恐行來遲
城壕失往路馬首迷荒陂
不惜翠雲裘遂為蒼耳欺
入門且

一笑把臂君為誰酒客愛秋蔬山盤薦霜梨他筵不下
筯此席忘朝飢酸棗垂北郭寒瓜蔓東籬還傾四五酌
自詠猛虎辭近作十日歡遠為千載期風流自簸蕩謔
浪偏相宜酣來上馬去却笑高陽池

與從姪杭州刺史良遊天竺寺

挂席凌蓬丘觀濤憩樟樓三山動逸興五馬同遨遊天
竺森在眼松風颯驚秋覽雲測變化弄水窮清幽疊嶂
隔遙海當軒寫歸流詩成傲雲月佳趣滿吳洲

同友人舟行遊台越作

楚臣傷江楓謝客拾海月懷沙去瀟湘挂席汎溟渤塞
余訪前跡獨往造窮髮古人不可攀去若浮雲沒願言
弄倒影從此鍊真骨華頂窺絕溟蓬壺望超忽不知青
春度但怪綠芳歇空持釣鰲心從此謝魏闕

下終南山過斛斯山人宿置酒

暮從碧山下山月隨人歸却顧所來徑蒼蒼橫翠微相
攜及田家童攜開荆扉綠竹入幽軒青蘿拂行衣歡言

得所憩美酒聊共揮長歌吟松風曲盡河星稀我醉君
復樂陶然共忘機

朝下過盧郎中叙舊遊

君登金華省我入銀臺門幸逢聖明主俱承雲雨恩復
此休浣時間為疇昔言却話山海事宛然林壑存明湖
思曉月疊嶂憶清猿何由返初服田野醉芳樽

邯鄲南亭觀妓

歌鼓燕趙兒魏姝弄鳴絲粉色豔月彩舞袖拂花枝把

酒顧美人請歌郎
鄆詞清箏何繚繞
度曲綠雲垂平原
君安在科斗生古
池座客三千人于
今知有誰我輩不
作樂但為後代悲

春遊羅敷潭

行歌入谷口路盡
無人躋攀崖度絕
壑弄水尋迴谿雲
從石上起客到花
間迷淹留未盡興
日落羣峰西

春陪商州裴使君遊石城谿

裴公有仙標拔俗
數千丈澹蕩滄洲
雲飄飄紫霞想剖

竹商洛間政成心已閒蕭條出世表冥寂閉玄關我來
屬芳節解榻時相悅褰帷對雲峰揚袂指松雪暫出東
城邊遂遊西巖前橫天聳翠壁噴壑鳴紅泉尋幽殊未
歇愛此春光發谿傍饒名花石上有好月命駕歸去來
露華生綠苔淹留惜將晚復聽清猿哀清猿斷人腸遊
子思故鄉明發首東路此歡焉可忘

宴鄭參卿山池

爾恐碧草晚我畏朱顏移愁看楊花飛置酒正相宜歌

聲送落日舞影迴清池
今夕不盡興留杯更邀誰

遊謝氏山亭

淪老卧江海再歡天地清
病閒久寂寞歲物徒芳榮
借君西地遊聊以散我情
掃雪松下去捫蘿石道行
謝公池塘上春草颯已生
花枝拂人來山鳥向我鳴
田家有美酒落日與之傾
醉罷弄歸月遙欣穉子迎

金陵鳳凰臺置酒

置酒延落景金陵鳳凰臺
長波寫萬古心與雲俱開
借

問往昔時鳳凰為誰來鳳凰去已久正當今日迴明君
越義軒天老坐三台豪士無所用彈絃醉金罍東風吹
山花安可不盡杯六帝沒幽草深宮冥綠苔置酒勿復
道歌鐘但相催

秋浦清谿雪夜對酒客有唱山鷓鴣者

披我貂襜褕對君白玉壺雪花酒上滅頻覺夜寒無客
有桂陽至能吟山鷓鴣清風動窗竹越鳥起相呼持此
足為樂何煩笙與竽

與周剛清谿玉鏡潭宴別

康樂上官去永嘉遊石門江中有孤嶼千載跡猶存我
來憩秋浦三入桃陂源千峰照積雪萬壑盡啼猿興與
謝公合文因周子論掃厓去落葉席月開清樽谿當大
樓南谿水正南奔迴作玉鏡潭澄明洗心魂此中得佳
境可以絕羗喧清夜方歸來酣歌出平原別後經此地
為余謝蘭蓀

夜泛洞庭尋裴侍御清酌

日晚湘水綠孤舟無端倪明湖漲秋月獨汎巴陵西遇
憩裴逸人巖居陵丹梯抱琴出深竹為我彈鷓鴣曲盡
酒亦傾北窗醉如泥人生且行樂何必組與珪

與南陵常贊府遊五松山

安石泛溟渤獨嘯長風還逸韻動海上高情出人間靈
異可並跡澹然與世閒我來五松下置酒窮躋攀徵古
絕遺老因名五松山五松何清幽勝境美沃州蕭颯鳴
洞壑終年風雨秋響入百泉去聽如三峽流剪竹掃天

花且同傲吏遊龍堂若可憇吾欲歸精修

宣城青谿二首

青谿勝桐廬水木有佳色山貌日高古石容天傾側彩
鳥昔未名白猿初相識不見同懷人對之空歎息

青谿清我心水色異諸水借問新安江見底何如此人
行明鏡中鳥弄屏風裏向晚猩猩啼空悲遠遊子

遊水西簡鄭明府

天宮水西寺雲錦照東郭清湍鳴迴谿綠水遶飛閣涼

風日瀟灑幽客時憩泊五月思貂裘謂言秋霜落石蘿
引古蔓岍筍開新籜吟翫空復情相思爾佳作鄭公詩
人秀逸韻宏寥廓何當一來遊愜我雪山諾

九日登山

淵明歸去來不與世相逐為無杯中物遂偶本州牧因
招白衣人笑酌黃花菊我來不得意虛過重陽時題興
何俊發遂結城南期築土按響山俯臨宛水湄胡人叫
玉笛越女彈霜絲自作英王胄斯樂不可窺赤鯉湧琴

高白龜道水夷靈仙如彷彿真酹遙相知古來登高人
今復幾人在滄洲違宿諾明日猶可待連山似驚波合
沓出溟海揚袂揮四座酩酊安所知齊歌送清觴起舞
亂參差賓隨落葉散帽逐秋風吹別後登此臺願言長
相思

九日

今日雲景好水綠秋山明攜壺酌流霞搴菊泛寒榮地
遠松石古風揚絃管清窺觴照歡顏獨笑還自傾落帽

醉山月空歌懷友生

登錦城散花樓

日照錦城頭朝光散花樓金窗夾繡戶珠箔懸瓊鉤飛
梯綠雲中極目散我憂暮雨向三峽春江繞雙流今來
一登望如上九天遊

登蛾眉山

蜀國多仙山蛾眉邈難匹周流試登覽絕怪安可悉青
冥倚天開彩錯疑畫出冷然紫霞賞果得錦囊術雲間

吟瓊簫石上弄寶瑟平生有微尚歡笑自此畢煙容如
在顏塵累忽相失儻逢騎羊子攜手凌白日

大庭庫

朝登大庭庫雲物何蒼然莫辨陳宅火空羆鄒魯煙我
來尋梓慎觀化入寥天古木翔氣多松風如五絃帝圖
終冥沒歎息滿山川

登單父陶少府半月臺

陶公有逸興不與常人俱築臺像半月迥出高城隅置

酒望白雲商飈起寒梧秋山入遠海桑柘羅平蕪水色
綠且明令人思鏡湖終當過江去愛此暫踟躕

登太白峰

西上太白峰夕陽窮登攀太白與我語為我開天闕願
乘冷風去直上浮雲間舉手可近月前行若無山一別
武功路何時復見還

荊門浮舟望蜀江

春水月峽來浮舟望安極正是桃花流依然錦江色江

色綠且明茫茫與天平逶迤巴山盡搖曳楚雲行雪照
聚沙雁花飛出谷鶯芳洲却已轉碧樹森森迎流目浦
煙夕揚帆海月生江陵識遙火應到渚宮城

望廬山瀑布水

西登香爐峰南見瀑布水挂流三百丈噴壑數十里歟
如飛電來隱若白虹起初驚河漢落半灑雲天裏仰觀
勢轉雄壯哉造化功海風吹不斷江月照還空空中亂
瀑射左右洗青壁飛珠散輕霞流沫沸穹石而我樂名

山對之心益閒無論漱瓊液且得洗塵顏仍諧宿所好
永願辭人間

望黃鶴樓

東望黃鶴山雄雄半空出四面生白雲中峰倚紅日巖
巒行穹跨峰嶂亦冥密頗聞列仙人于此學飛術一朝
向蓬海千載空石室金竈生煙埃玉潭秘清謐地古遺
草木庭寒老芝朮塞予羨攀躋因欲保閒逸觀竒徧諸
嶽茲嶺不可匹結心寄青松永悟客情畢

秋登巴陵望洞庭

清晨登巴陵周覽無不極
明湖映天光徹底見秋色
秋色秋色何蒼然際海俱澄鮮
山青滅遠樹水綠無寒煙
來帆出江中去鳥向日邊
風清長沙浦霜空雲夢田
瞻光惜頽髮閱水悲徂年
北渚既蕩漾東流自潺湲
郢人唱白雪越女歌采蓮
聽此更腸斷憑崖淚如泉

入彭蠡經松門觀石鏡緬懷謝康樂題詩書遊覽之志

謝公之彭蠡因此遊松門余方窺石鏡兼得窮江源欲
將繼風雅豈徒清心寬前賞逾所見後來道空存況屬
臨汎美而無洲渚喧漾水向東去漳流直南奔空濛二
川夕迴合千里昏青桂隱遙月綠楓鳴愁猿水碧或可
采金精秘莫論吾將學仙去冀與琴高言

安州應城玉女湯作

神女歿幽境湯池流大川陰陽結炎炭造化開靈泉地
底爍朱火沙傍歆素煙沸珠躍晴月皎鏡涵空天氣浮

蘭芳滿色漲桃花然精覽萬殊入潛行七澤連愈疾功
莫尚變盈道乃全濯纓掬清泚晞髮弄潺湲散下楚王
國分澆宋玉田可以奉巡幸奈何隔窮偏獨隨朝宗水
赴海輸微涓

之廣陵宿常二南郭幽居

綠水接柴門有如桃花源忘憂或假草滿院羅叢萱暝
色湖上來微雨飛南軒故人宿茅宇夕鳥栖楊園還惜
詩酒別深為江海言明朝廣陵道獨憶此傾樽

宿清谿主人

夜到清谿宿主人碧巖裏簷楹挂星斗枕席響風水月
落西山時啾啾夜猿起

過汪氏別業

疇昔未識君知君好賢才隨山起館宇鑿石營池臺星
火五月中景風從南來數枝石榴發一丈荷花開恨不
當此時相過醉金壺我行值木落月苦清猿哀永夜達
五更吳歛送瓊杯酒酣欲起舞四座歌相催日出遠海

明軒車且徘徊更遊龍潭去枕石拂莓苔

題元丹丘山居

故人棲東山自愛丘壑美青春卧空林白日猶不起松
風清襟袖石潭洗心耳羨君無紛喧高枕碧霞裏

題江夏靜脩寺

我家北海宅作寺南江濱空庭無玉樹高殿坐幽人書
帶留青草琴堂羃素塵平生種桃李寂滅不成春

尋高鳳石門山中元丹丘

尋幽無前期乘興不覺遠蒼崖渺難涉白石忽欲晚未
窮三四山已歷千萬轉寂寂聞猿愁行行見雲收高松
上好月空谷宜清秋谿深古雪在石斷寒泉流峰巒秀
中天登眺不可盡丹丘遙相呼顧我忽而哂遂造窮谷
間始知靜者閒留歡達永夜清曉方言還

月下獨酌二首

花間一壺酒獨酌無相親舉杯邀明月對影成三人月
既不解飲影徒隨我身暫伴月將影行樂須及春我歌

月徘徊我舞影凌亂醒時同交歡醉後各分散永結無情遊相期邈雲漢

天若不愛酒酒星不在天地若不愛酒地應無酒泉天地既愛酒愛酒不愧天已聞清比聖復道濁如賢聖賢既已飲何必求神仙三杯通大道一斗合自然但得酒中趣勿為醒者傳

春歸終南山松龕舊隱

我來南山陽事事不異昔却尋谿中水還望巖下石蒿

薇緣東窗女蘿遶北壁別來能幾日草木長數尺且復
命酒樽獨酌陶永夕

尋山僧不遇作

石徑入丹壑松門閉青苔閒堦有鳥跡禪室無人開窺
窗見白拂挂壁生塵埃使我空歎息欲去仍徘徊香雲
徧山起花雨從天來已有空樂好况聞清猿哀了然絕
世事此地方悠哉

獨酌

欽定四庫全書

石齋先生詩選
卷四十四上

春草如有意羅生玉堂陰東風吹愁來白髮坐相侵獨
酌勸孤影閒歌面芳林長松爾何知蕭瑟為誰吟手舞
石上月膝橫花間琴過此一壺外悠悠非我心

春日獨酌

我有紫霞想緬懷滄洲間思對一壺酒澹然萬事閒橫
琴倚高松把酒望遠山長空去鳥沒落日孤雲還但恐
光景晚宿昔成秋顏

魯東門觀刈蒲

魯國寒事早初霜刈渚蒲揮鋏若轉月拂水生連珠此
草最可珍何必貴龍鬚織作玉牀席欣承清夜娛羅衣
能再拂不畏素塵蕪

上三峽

巫山夾青天巴水流若茲巴水忽可盡青天無到時三
朝上黃牛三暮行太遲三朝又三暮不覺鬢成絲

自巴東舟行經瞿塘峽登巫山最高峰晚還題

壁

江行幾千里海月十五圓始經瞿塘峽遂步巫山巔巫
山高不窮巴國盡所歷日邊攀垂蘿霞外倚穹石飛步
凌絕頂極目無纖煙却顧失丹壑仰觀臨青天青天若
可捫銀漢去安在望雲知蒼梧記水辨瀛海周遊孤光
晚歷覽幽意多積雪照空谷悲風鳴森柯歸途行欲曛
佳趣尚未歇江寒早啼猿松暝已吐月月色何悠悠清
猿何啾啾辭山不忍聽揮策還孤舟

宿鰕湖

雞鳴發黃源，暝投鰕湖宿。
白雨映寒山，森森似銀竹。
提携鉛客結，荷水邊沐。
半夜四天開，星河爛人目。
晨大樓去岡隴，多屈伏當與持斧翁。
前谿伐雲木。

白田馬上聞鶯

黃鸝啄紫椹，五月鳴桑枝。
我行不記日，誤作陽春時。
蠶老客未歸，白田已縹絲。
驅馬又前去，捫心空自悲。

日夕山中忽然有懷

久卧名山雲，遂為名山客。
山深雲更好，賞弄終日夕。
月

銜樓間峰泉漱階下石素心自此得真趣非外惜艱啼
桂方秋風滅籟歸寂緬思洪崖術欲往滄海隔雲車來
何遲撫已空嘆息

春日醉起言志

處世若大夢胡為勞其生所以終日醉頽然卧前楹覺
來眊庭前一鳥花間鳴借問此何時春風語流鶯感之
欲歎息對酒還自傾浩歌待明月曲盡已忘情

廬山東林寺夜懷

我尋青蓮宇獨往謝城闕
霜清東林鐘水白虎谿月天
香生虛空天樂鳴不歇宴坐寂不動大千入毫髮湛然
冥真心曠劫斷出沒

望月有懷

清泉映疎松不知幾千古寒月搖輕波流光入窗戶對
此空長吟思君意何深無因見安道興盡愁人心

春滯沅湘有懷山中

沅湘春色還風暖煙草綠古之傷心人于此腸斷續予

非懷沙客但美采菱曲所願歸東山寸心于此足

憶秋浦桃花舊遊時竄夜郎

桃花春水生白石今出沒搖蕩女羅枝半搖青天月不
知舊行徑初拳幾枝蕨三載夜郎還于茲鍊金骨

郢門秋懷

郢門一為客巴月三成弦朔風正搖落行子愁歸旋香
香山外日茫茫江上天人迷洞庭水雁度瀟湘煙清曠
諧宿好緇磷及此年百齡何蕩漾萬化相推遷空謁蒼

梧帝徒尋溟海仙已聞蓬海淺豈見三桃園倚劍增浩
歎捫襟還自憐終當遊五湖濯足滄浪泉

越中秋懷

越水遶碧山周迴數千里乃是天鏡中分明盡相似愛
此從冥搜永懷林湍幽一為滄波客十見紅葉秋觀濤
壯天險望海令人愁路遐迫西照歲晚悲東流何必探
禹穴逝將歸蓬丘不然五湖上亦可乘扁舟

尋陽紫極宮感秋作

何處聞秋聲
脩脩北窗竹
迴薄萬古心
攬之不盈掬
靜坐觀衆妙
浩然媚幽獨
白雲南山來
就我簷下宿
嬾從唐生決
羞訪季主卜
四十九年非
一往不可復
野情轉蕭散
世道有翻覆
陶令歸去來
田家酒應熟

江上秋懷

餐霞卧舊壑
散髮謝遠遊
山蟬號枯桑
始復知天秋
朔雁別海裔
越燕辭江樓
颯颯風卷沙
茫茫霧縈洲
黃雲結暮色
白水揚寒流
惻愴心自悲
潺湲淚難收
蘅蘭方

蕭瑟長歎令人愁

荊州賊平臨洞庭言志作

脩虬橫洞庭吞象臨江島積骨成巴陵遺言聞楚老水
窮三苗國地窄三湘道歲晏天崢嶸時危人枯槁思歸
阻喪亂去國傷懷抱郢路方丘墟章華亦傾倒風悲猿
嘯苦木落鴻飛早日隱西赤沙月明東城草關河望已
絕氛霧行當掃長吁天可聞吾將問蒼昊

江南春懷

青春幾何時黃鳥鳴不歇天涯失鄉路江外老華髮心
飛秦塞雲影滯楚關月身世殊爛熳田園久蕪沒歲晏
何所從長歌謝金闕

秋夕旅懷

涼風度秋海吹我鄉思飛連山去無際流水何時歸目
極浮雲色心斷明月輝芳草歇柔艷白露催寒衣夢長
銀漢落覺罷天星稀含歎想舊國泣下誰能揮

西施

西施越溪女出自苧蘿山秀色掩今古荷花羞玉顏浣
紗弄碧水目與清波閒皓齒信難開沈吟碧雲間勾踐
徵絕豔揚蛾入吳關提攜館娃宮杳眇詎可攀一破夫
差國千秋竟不還

峴山懷古

訪古登峴首憑高眺襄中天清遠峰出水落寒沙空弄
珠見遊女醉月懷山公感歎發秋興長松鳴夜風

蘓武

蘇武在匈奴十年持漢節白雁上林飛空傳一書札牧
羊邊地苦落日歸心絕渴飲月窟冰飢餐天上雪東還
沙塞遠北愴河梁別泣把李陵衣相看淚成血

經下邳圯橋懷張子房

子房未虎嘯破產不為家滄海得壯士椎秦博浪沙報
韓雖不成天地皆振動潛匿遊下邳豈曰非智勇我來
圯橋上懷古欽英風惟見碧流水曾無黃石公歎息此
人去蕭條徐泗空

學古思邊

銜悲上隴首腸斷不見君流水若有情幽哀從此分蒼
茫愁邊色惆悵落日曛山外接遠天天際復浮雲白雁
從中來飛鳴苦難聞足繫一書札寄言難離羣離羣心
斷絕十見花成雪胡地無春暉征人行不歸相思杳如
夢珠淚濕羅衣

代美人愁鏡

明明金鵲鏡了了玉臺前拂拭交冰月光輝何清圓紅

顏老昨日白髮多去年鉛粉坐相誤照來空悽然

秋浦寄內

我今尋陽去辭家千里餘結荷見水宿却寄大雷書雖
不同辛苦愴離各自居我自入秋浦三年北信疎紅顏
愁落盡白髮不能除有客自梁苑手攜五色魚開魚得
錦字歸問我何如江山雖道阻意合不為殊

侍從宜春苑奉詔賦龍池柳色初青聽新鶯百

轉歌

東風已綠瀛洲草紫殿紅樓覺春好池南柳色半青青
紫煙裊娜拂綺城垂絲百尺挂雕楹上有好鳥相和鳴
間關早得春風情春風捲入碧雲去千門萬戶皆春聲
是時君王在鎬京五雲垂暉耀紫清仗出金宮隨日轉
天迴玉輦繞花行始向蓬萊看鶴舞還過萑若聽新鶯
新鶯飛繞上林苑願入簫韶雜鳳笙

烏夜啼

黃雲城邊烏欲棲歸飛啞啞枝上啼機中織錦秦川女

碧紗如煙隔窗語停梭悵然憶遠人獨宿孤房淚如雨

烏棲曲

姑蘇臺上烏棲時吳王宮裏醉西施吳歌楚舞歡未畢
青山欲銜半邊日銀箭金壺漏水多起看秋月墜江波
東方漸高奈樂何

采蓮曲

若耶溪傍采蓮女笑隔荷衣共人語日照新妝水底明
風飄香袖空中舉岸上誰家遊冶郎三三五五映垂楊

紫騮嘶入落花去見此踟躕空斷腸

鳳笙曲

仙人十五愛吹笙學得崑丘彩鳳鳴始聞鍊氣餐金液
復道朝天赴玉京玉京迢迢幾千里鳳笙去去無窮已
欲歎離聲發絳唇更嗟別調流纖指此時惜別詎堪聞
此地相看未忍分重吟真曲和清吹却奏仙歌響綠雲
綠雲紫氣向函關訪道應尋緱氏山莫學吹笙王子晉
一遇浮丘斷不還

擣衣篇

閨裏佳人年十餘
嚙蛾對影恨離居
忽逢江上春歸燕
銜得雲中尺素書
玉手開絨長歎息
征夫猶戍交河北
萬里交河水北流
願為雙鳥泛中洲
君邊雲擁青絲騎
妾處苔生紅粉樓
樓上春風日將歇
誰能覽鏡看愁髮
曉吹員管隨落花
夜擣戎衣向明月
明月高高刻漏長
真珠簾箔掩蘭堂
橫垂寶幄同心結
半拂瓊筵蘇合香
瓊筵寶幄連枝錦
燈燭熒熒照孤寢
有使憑將金剪刀

為君留下相思枕，摘盡庭蘭不見君。
紅巾拭淚坐氤氲，明年若更征邊塞。
願作陽臺一段雲。

江上吟

木蘭之枻沙棠舟，玉簫金管坐兩頭。
美酒當中置千斛，載妓隨波任去留。
仙人有待乘黃鶴，海客無心隨白鷗。
屈平詞賦懸日月，楚王臺榭空山丘。
興酣落筆搖五嶽，詩成嘯傲凌滄洲。
功名富貴若長在，漢水亦應西北流。

荊州樂

白帝城邊足風波瞿塘五月誰敢過荆門麥熟繭成蛾
繰絲憶君頭緒多撥穀飛鳴奈妾何

梁園吟

我浮黃河去京闕挂席欲進波連山天長水濶厭遠涉
訪古始及平臺間平臺為客憂思多對酒遂作梁園歌
却憶蓬池阮公詠因吟淶水楊洪波洪波浩蕩迷舊國
路遠西歸安可得人生達命豈暇愁且飲美酒登高樓
平頭奴子搖大扇五月不熱如清秋玉盤楊梅為君設

吳鹽如花皎白雪持鹽把酒但飲之莫學夷齊事高潔
昔人豪貴信陵君今人耕種信陵墳荒城遠照碧山月
古木盡入蒼梧雲梁王宮闕今安在枚馬先歸不相待
舞影歌聲散綠池空餘汴水東流海沈吟此事淚滿衣
黃金買醉未能歸連呼五白行六博分曹賭酒酣馳輝
歌且謠意方遠東山高卧時起來欲濟蒼生未應晚

山鷓鴣詞

苦竹嶺頭秋月輝苦竹南枝鷓鴣飛嫁得燕王胡雁婿

欲銜我向雁門歸
山雞翟雉來相勸
南禽多被北禽欺
紫塞嚴霜如劍戟
蒼梧欲巢難背違
我今誓死不能去
哀鳴驚叫淚沾衣

醉後贈從甥高鎮

馬上相逢揖馬鞭
客中相見客中憐
欲邀擊筑悲歌飲
正值傾家無酒錢
江東風月不借人
枉殺落花空自春
黃金逐手快意盡
昨日破產今朝貧
丈夫何事空嘯傲
不如燒却頭上巾
君為進士不得進
我被秋霜生旅鬢

時清不及英豪人三尺童兒重廉蔭匣中盤劍裝鰐魚
閒在腰間未用渠且將換酒與君醉醉歸托宿吳鉤諸

走筆贈獨孤駙馬

都尉朝天躍馬歸香風吹人花亂飛銀鞍紫鞵照雲日
左顧右眄生光輝是時僕在金門裏待詔公車謁天子
長揖蒙垂國士恩壯心剖出酬知己一別蹉跎朝市間
青雲之交不可攀儻其公子重回顧何必侯嬴長抱關

流夜郎贈辛判官

昔在長安醉花柳五侯七貴同杯酒氣岼遙凌豪士前
風流肯落他人後夫子紅顏我少年章臺走馬著金鞭
文章獻納麒麟殿歌舞淹留玳瑁筵與君自謂長如此
寧知草動風塵起函谷忽驚胡馬來秦宮桃李向明開
我愁遠謫夜郎去何日金雞放赦回

江上贈竇長史

漢求季布魯朱家楚逐伍胥去章華萬里南遷夜郎國
三年歸及長風沙聞道青雲貴公子錦帆遊奕西江水

人疑天上坐樓船
水淨霞明兩重綺
相約相期何太深
棹歌搖艇月中尋
不同珠履三千客
別欲論交一片心

贈漢陽輔錄事

鸚鵡洲橫漢陽渡
水引寒煙沒江樹
南浦登樓不見君
君今罷官在何處
漢口雙魚白錦鱗
令傳尺素報情人
其中字數無多少
祇是相思秋復春

春日獨坐寄鄭明府

燕麥青青遊子悲
河堤弱柳鬱金枝
長條一拂春風去

盡日飄揚無定時我在河南別離久那堪坐此對窗牖
情人道來竟不來何人共醉新豐酒

早春寄王漢陽

聞道春還未相識走傍寒梅訪消息昨夜東風入武陽
陌頭楊柳黃金色碧水浩浩雲茫茫美人不來空斷腸
預拂青山一片石與君連日醉壺觴

涇谿東亭寄鄭少府諤

我遊東亭不見君沙上行將白鷺羣白鷺行時散飛去

又如雪點青山雲欲往
涇谿不辭遠龍門颺波虎眼轉
杜鵑花開春已闌
歸向陵陽釣魚晚

西嶽雲臺歌送丹丘子

西嶽崢嶸何壯哉
黃河如絲天際來
黃河萬里觸山動
盤渦轂轉秦地雷
榮光休氣紛五采
千年一清聖人在
巨靈咆哮擘兩山
洪波噴流射東海
三峰却立如欲摧
翠崖丹谷高掌開
白帝金精運元氣
石作蓮花雲作臺
雲臺閣道連窈冥
中有不死丹丘生
明星玉女備灑掃

麻姑搔背指爪輕我皇手把天地戶丹丘談天與天語
九重出入生光輝東求蓬萊復西歸玉漿僮僮故人飲
騎二茅龍上天飛

金陵歌送別范宣

石頭巉巖如虎踞凌波欲過滄江去鍾山龍盤走勢來
秀色橫分歷陽樹四十餘帝三百秋功名事跡隨東流
白馬小兒誰家子太清之歲來關囚金陵昔時何壯哉
席卷英豪天下來冠蓋散為煙霧盡金輿玉座成寒灰

扣劍悲鳴空咄嗟
梁陳白骨亂如麻
天子龍沈景陽井
誰歌玉樹後庭花
此地傷心不能道
目下離離長春草
送爾長江萬里心
他年來訪南山老

峨眉山月歌送蜀僧晏入中京

我在巴東三峽時
西看明月憶峨眉
月出峨眉照滄海
與人萬里長相隨
黃鶴樓前月華白
此中忽見峨眉客
峨眉山月還送君
風吹西到長安陌
長安大道橫九天
峨眉山月照秦川
黃金獅子承高座
白玉麈尾談重玄

我似浮雲殢吳越君逢聖主遊丹闕一振高名滿帝都
歸來還弄峨眉月

赤壁歌送別

二龍爭戰決雌雄赤壁樓船掃地空烈火張天照雲海
周瑜于此破曹公君去滄江望澄碧鯨鯢唐突留餘跡
一一書來報故人我欲因之壯心魄

白雲歌送友人

楚山秦山多白雲白雲處處長隨君君今還入楚山裏

雲亦隨君渡湘水
水上女蘿衣
白雲早卧早行君早起
送程劉二侍御兼獨孤判官赴安西幕府

安西幕府多材雄
喧喧惟道三數公
繡衣貂裘明積雪
飛書走檄如飄風
朝辭明主出紫宮
銀鞍送別金城空
天外飛霜下蔥海
火旗雲馬生光彩
胡塞塵清計日歸
漢家草綠遙相待

同王昌齡送族弟襄歸桂陽

爾家何在瀟湘川
青莎白石長江邊
昨夢江花照江月

幾枝正發東窗前覺來欲往心悠然魂隨越鳥飛南天
秦雲連山海相接桂水橫煙不可涉送君此去令人愁
風帆茫茫隔河洲春潭瓊草綠可折西寄長安明月樓

送蕭三十一之魯中兼問穉子伯禽

六月南風吹白沙吳牛喘月氣成霞水國鬱蒸不可處
時炎道遠無行車夫子如何涉江路雲帆嫋嫋金陵去
高堂倚門望伯魚魯中正是趨庭處我家寄在沙丘傍
三年不歸空斷腸君行既識伯禽子應駕小車騎白羊

與諸君送陳郎將歸衡陽并序

仲尼旅人文王明夷苟非其時聖賢低眉況僕之
不肖者而遷逐枯槁固非其宜朝心不開暮髮盡
白而登高送遠使人增愁陳郎將義氣凜然英思
逸發來下曹城之榻去邀才子之詩動清興于中
流泛素波而徑去諸公仰望不及連章祖之序慙
起予輒冠名賢之首作者嗤我乃為撫掌之資乎
衡山蒼蒼入紫冥下看南極老人星迴飈吹散五峰雪

往往飛花落洞庭氣清目秀有如此郎將一家拖金紫
門前食客亂浮雲世人皆比孟嘗君江上送行無白璧
臨歧惆悵若為分

金陵酒肆留別

白門柳花滿店香吳姬壓酒喚客嘗金陵子弟來相送
欲行不行各盡觴請君問取東流水別意與之誰短長

南陵別兒童入京

白酒新熟山中歸黃雞啄黍秋正肥呼童烹雞酌白酒

兒女嬉笑牽人衣高歌取醉欲自慰起舞落日爭光輝
游說萬乘苦不早著鞭跨馬涉遠道會稽愚婦輕買臣
余亦辭家西入秦仰天大笑出門去我輩豈是蓬蒿人

別山僧

何處名僧到水西乘舟弄月出涇谿平明別我上山去
手攜金策踏雲梯騰身轉覺三天近舉足迴看萬嶺低
謔浪肯居支遁下風流還與遠公齊此度別離何日見
相思一夜暝猿啼

把酒問月

青天有月來幾時我今停杯一問之人攀明月不可得
月行却與人相隨皎如飛鏡臨丹闕綠煙滅盡清輝發
但見宵從海上來寧知曉向雲間沒白兔擣藥秋復春
嫦娥孤棲與誰隣今人不見古時月今月曾經照古人
古人今人若流水共看明月皆如此惟願當歌對酒時
月光長照金樽裏

勞勞亭歌

金陵勞勞送客堂蔓草離離生道傍古情不盡東流水
此地悲風愁白楊我乘素舸同康樂朗詠清川飛夜霜
昔聞牛渚吟五章今來何謝袁家郎苦竹寒聲動秋月
獨宿空簾歸夢長

金陵城西樓月下吟

金陵夜寂涼風發獨上高樓望吳越白雲映水搖空城
白露垂珠滴秋月月下沈吟久不歸古來相接眼中稀
解道澄江淨如練令人長憶謝玄暉

當塗趙炎少府粉圖山水歌

峨眉高出西極天，羅浮直與南溟連。
名公繹思揮彩筆，驅山走海置眼前。
滿堂空翠如可掃，赤城霞氣蒼梧煙。
洞庭瀟湘意渺漭，三江七澤情迴沿。
驚濤洶湧向何處，孤舟一去迷歸年。
征帆不動亦不旋，飄如隨風落天邊。
心搖目斷興難盡，幾時可到三山巔。
西峰崢嶸噴流泉，橫石蹙水波潺湲。
東崖合沓蔽輕霧，深林雜樹空芊緜。
此中冥昧失晝夜，隱几寂聽無鳴蟬。
長松之下列羽客，

對坐不語南昌仙
南昌仙人趙夫子
妙年歷落青雲士
訟庭無事羅衆賓
杳然如在丹青裏
五色粉圖安足珍
真仙可以全吾身
若待功成拂衣去
武陵桃花笑殺人

觀元丹丘座巫山屏風

昔遊三峽見巫山
見畫巫山宛相似
疑是天邊十二峰
飛入君家畫屏裏
寒松蕭颯如有聲
陽臺微茫如有情
錦衾瑤席何寂寂
楚王神女徒盈盈
高高唐尺尺無千里
翠屏丹崖粲如綺
蒼蒼遠樹圍荆門
歷歷行舟泛巴水

水石潺湲萬壑分煙光草色俱氤氲
花笑日何年發江客聽猿幾歲聞
使人對此心緬邈疑入嵩丘夢彩雲

思邊

去年何時君別妾南園綠草飛蝴蝶
今歲何時妾憶君西山白雪暗秦雲
玉關去此三千里欲寄音書那得聞

怨情

新人如花雖可寵故人似玉由來重
花性飄揚不自持玉心皎潔終不移
故人昔新今尚故還見新人有故時

請看陳后黃金屋寂寂珠簾生蜩絲

示金陵子

金陵城東誰家子竊聽琴聲碧窗裏落花一片天上來
隨人直渡西江水楚歌吳語嬌不成似能未能最有情
謝公正要東山妓攜手林泉處處行

遠別離

遠別離古有皇英之二女乃在洞庭之南瀟湘之浦海
水直下萬里深誰人不言此離苦日慘慘兮雲冥冥猩

猩啼煙兮鬼嘯雨我縱言之將何補皇穹竊恐不照余
之忠誠雷馮馮兮欲吼怒堯舜當之亦禪禹君失臣兮
龍為魚權歸臣兮鼠變虎或言堯幽囚舜野死九疑聯
縣皆相似重瞳孤墳竟誰是帝子泣兮綠雲間隨風波
兮去無還慟哭兮遠望見蒼梧之深山蒼梧山崩湘水
絕竹上之淚乃可滅

蜀道難

噫吁嚱危乎高哉蜀道之難難于上青天蠶叢及魚鳧

開國何茫然爾來四萬八千歲不與秦塞通人煙西當
太白有鳥道可以橫絕峨眉巔地崩山摧壯士死然後
天梯石棧相鈎連上有六龍迴日之高標下有衝波逆
折之迴川黃鶴之飛尚不得猿猱欲度愁攀緣青泥何
盤盤百步九折縈巖壑捫參歷井仰脅息以手撫膺坐
長歎問君西遊何時還畏途巉巖不可攀但見悲鳥號
古木雄飛雌從繞林間又聞子規啼夜月愁空山蜀道
之難難于上青天使人聽此凋朱顏連峰去天不盈尺

孤松倒挂倚絕壁飛湍瀑流爭喧飗砢崖轉石萬壑雷
其險也如此嗟爾遠道之人胡為乎來哉劍閣崢嶸而
崔巍一夫當關萬人莫開所守或匪親化為狼與豺朝
避猛虎夕避長蛇磨牙吮血殺人如麻錦城雖云樂不
如早還家蜀道之難難于上青天側身西望長咨嗟

梁父吟

長嘯梁父吟何時見陽春君不見朝歌屠叟辭棘津八
十西來釣渭濱寧羞白髮照綠水逢時吐氣思經綸廣

張三千六百鈞風期暗與文王親大賢虎變愚不測當
年頗似尋常人又不見高陽酒徒起草中長揖山東隆
準公一開游說騁雄辯兩女輟洗來趨風東下齊城七
十二指揮楚漢如旋蓬狂客落魄尚如此何況壯士當
羣雄我欲攀龍見明主雷公砰訇震天鼓帝傍投壺多
玉女三時大笑生電光倏爍晦冥起風雨閭闔九門不
可通以額扣闕闔者怒白日不照吾精誠祀國無事憂
天傾楔猱磨牙競人肉騶虞不折生草莖手接飛猱搏

彫虎側足焦原未言苦智者可卷愚可豪世人見我輕
鴻毛力排南山三壯士齊相殺之費二桃吳楚弄兵無
劇孟亞夫咥爾為徒勞梁父吟梁父吟聲正悲張公兩
龍劍神物合有時風雲感會起屠釣大人峴岿當安之

戰城南

去年戰桑乾源今年戰蔥河道洗兵條支海上波放馬
天山雪中草萬里長征戰三軍盡衰老匈奴以殺戮為
耕作古來惟見白骨黃沙田秦家築城備胡處漢家還

有烽火然烽火然不息長征無已時野戰格鬪死敗馬
嘶鳴向天悲烏鳶啄人腸銜飛上挂枯樹枝士卒塗草
莽將軍空爾為

將進酒

君不見黃河之水天上來奔流倒海不復回君不見高
堂明鏡悲白髮朝如青絲暮成雪人生得意須盡歡莫
使金樽空對月天生我才必有用千金散盡還復來烹
羊宰牛且為樂會須一飲三百杯岑夫子丹丘生將進

酒君莫停與君歌一曲請君為我傾耳聽鐘鼎玉帛豈
足貴但願長醉不用醒古來聖賢皆寂寞惟有飲者留
其名陳王昔時宴平樂斗酒十千恣謔譔主人何為言
少錢徑須沽取對君酌五花馬千金裘呼兒將出換美
酒與爾同銷萬古愁

行行且遊獵篇

邊城兒生平不讀一字書但將遊獵誇輕趨胡馬秋肥
宜白草騎來躡影何矜驕金鞭拂雪揮鳴鞘半酣呼鷹

出遠郊弓彎滿月不虛發雙鶴迸落連飛鶻海邊觀者
皆辟易猛氣英風振沙磧儒生不及游俠人白首垂帷
復何益

飛龍引二首

黃帝鑄鼎于荆山鍊丹砂丹砂成黃金騎龍飛上太清
家雲愁海思令人嗟宮中綵女顏如花飄然揮手凌紫
霞從風縱體登鸞車登鸞車侍軒轅遨遊青天中其樂
不可言

鼎湖流水清且閒，軒轅去時有弓劍。古人傳道留其間，
後宮嬋娟多花顏。乘鸞飛煙亦不還，騎龍攀天造天關。
造天關，聞天語，屯雲河車載玉女。載玉女，過紫皇，紫皇
乃賜白兔所搗之藥方。後天而老，周三光，下視瑤池見
王母。蛾眉蕭颯成秋霜。

天馬歌

天馬來出月氏窟，背為虎文龍翼骨。嘶青雲，振綠髮，蘭
筋權奇走滅沒。騰崑崙，崙崙歷西極，四足無一蹶。雞鳴刷燕

晡秣越神行電邁躡恍惚天馬呼飛黃趨目明長庚臆
雙鳧尾如流星首渴烏口噴紅光汗溝珠曾陪時龍躍
天衢羈金絡月照皇都逸氣稜稜凌九區白壁如山誰
敢沾回頭笑紫燕但覺爾輩愚天馬奔戀君軒駮躍驚
矯浮雲翻萬里足躑躅遙瞻閭闔門不逢寒風子誰采
逸景孫白雲在青天丘陵遠崔嵬鹽車上峻坂倒行逆
施畏日晚伯樂剪拂中道遺少盡其力老棄之願逢田
子方惻然為我悲雖有玉山禾不能療苦饑嚴霜五月

凋桂枝伏樞銜冤摧兩眉請君贖獻穆天子猶堪弄影
舞瑤池

行路難三首


金樽清酒斗十千玉盤珍羞直萬錢停杯投箸不能食
拔劍四顧心茫然欲渡黃河水塞川將登太行雪暗天
閒來垂釣坐谿上忽復弄舟夢日邊行路難行路難多
岐路今安在長風破浪會有時直挂雲帆濟滄海

大道如青天我獨不得出羞逐長安社中兒赤雞白雉

睹梨栗彈劍作歌奏苦聲
曳裾王門不稱情
淮陰市井笑韓信
漢朝公卿忌賈生
君不見昔時燕家重郭隗
擁篲折節無嫌猜
劇辛樂毅感恩分
輸肝剖膽效俊才
昭王白骨縈蔓草
誰人更掃黃金臺
行路難歸去來

有耳莫洗潁川水
有口莫食首陽蕨
含光混世貴無名
何用孤高比明月
吾觀自古賢達人
功成不退皆殞身
子胥既棄吳
江上屈原終投湘
水濱
陸機雄才豈自保
李斯稅駕苦不早
華亭唳鶴詎可聞
上蔡蒼鷹何足道

君不見吳中張翰稱達生秋風忽憶江東行且樂生前
一杯酒何須身後千載名



石倉歷代詩選卷四十四上